

亥21

1-5

醫學叢書

產育寶慶方二卷



產寶錄



光緒四辛秋日

渠濠叟署檢



原序

人有一念之善可以動天地感鬼神至其充大之則
利益于世奚有限量人惟溺于私欲雖有善念爾汝
其心差殊其見畦畛其用險隘偏小不足觀矣趙君
德脩公族之賢者其爲人也用心平處已正議論不
阿曲事無纖巨一歸于是每念貧而病者艱于得藥
惠施周急常恐不及非吉人爲善惟日不足者乎今
又取諸家產方之得效者集爲一編鋟木廣施善念
之充若火之然若泉之達莫之能禦則是方一出見
者用者活者將不可勝計其利溥哉與世之有藥而

不施施藥而秘其方者天淵矣劉四垣序

右產育寶慶集方郭稽中纂李師聖作序于山甫印
施余始宦歷陽而師聖憲淮西山甫時侍因得數帙
始置篋笥未窺其妙洎余室家蓐中不豫初苦寒熱
殆如瘧狀及閱此方得其增損四物湯適中其病製
之以服至再而愈嘗復苦腹痛瀉痢又得第十論調
中湯服之不再而頓止異時蓐後復苦痞悶咽乾因
詰其證果復渴甚中夜得見睨丸方待旦置藥旋成
纔服既患已安矣自是余家頗神此方往往因人傳
授及付以方無不獲效頃在泚訪表舅李師禮及門

且久聞妾在蓐方病危篤嘔吐脹滿粥藥不下因語
此方遍索之不得德邵兄領學事淮右聞之遍令公
皂購之始得印本于醫家乃李憲攝帥日施于郡人
者也尋得大聖散合成姑試服而不嘔良久與粥凡
三服而無恙師禮以爲神亟欲鏤板但未得其全本
余欲刊施而未暇近以海陵親戚間有患崩中不止
者須臾眼黑眩暈殆至悶死時篋中偶有清魂散急
遣灌之良久稍蘇再進遂安益信此方之妙無不獲
效者中間止餘一帙以喜禾相知借去遂亡其本每
以爲恨後十餘年與山甫相遇都城時方同在圍中

雖憂惴百不暇及首詢此板屬以居相近因得印之
復以此本遺山甫因書于後王晉序

婦人產育雖曰常事其實甚危調護或失其宜藥石
或乖其用則爲害不細此前輩所以諄諄于方論之
間也余友人得產乳備要乃盱江傅君教授常刊于
澧陽郡庠因以家藏舊本稍加校正增以楊子建七
說并產論同爲一集鋟木以廣之庶幾有補于萬一
云趙瑩序

醫家者流嘗謂甯治百男子不治一婦人況產婦乎
蓋療產婦之證爲難而產前之證尤難胎氣旣成世

之人徒知以十月爲產期而不知有過期之產者宋
儒已論之詳矣亦謂之常而不謂之變甚哉異人異
書之爲可重此產育寶慶之書所以增廣其傳也書
旣刊行德脩命題其後余憮然曰是書之出無患其
不傳吾聞君子居其室出其言善則千里之外應之
今子處獨善之時而有兼善之心不其大矣乎將見
不期應而應之至是可喜也寓齋老人序

山野草澤間苦無素業醫流妙手產媼是書足以備
一時緩急之用觀此前序足見其人矣頤齋老人題
妊娠之理內經定以十月爲正產者尙矣間有過期

者蓋古之賢聖之生如此然聞其語未見其人也比
年以來妊之過產者遠者不得而知近在燕趙間時
復有之方妊之初也信其爲妊及其過產則反疑其
非妊也問之產媪則曰未之見也問之名醫則曰出
月出月者貴問之方士則曰妖也以妖治之問之庸
醫則曰病也以病治之二者俱失至有子母俱不救
者旣而方知其妊也雖悔其可追耶余聞之甚可悼
矣恨無可考之方以破其惑也一日過醫公李甯之
家示一書曰產育寶慶集披讀一二蓋宋儒李師聖
郭稽中楊子建輩之所編集至生產篇云婦人懷胎

有七月八月九月十月而產者亦有經一年至二年
三年四年五年而後產者蓋人之生陰注陽定自有
時日不可改移今獨限以十月似爲未盡讀不終篇
不覺屢歎惜乎此書在世希有若能廣傳使天下其
知則人生安得罹殤天之禍乎意謂婦人方經雖多
而產書難其全者若是一或廢失世間必不復有也
因問誰氏之書公曰外郎楊士表所秘藏也輒親往
謁告以情實求之忻然見許遂得原書印本方議刊
行公曰此止一產書也若更將御藥院雜病方論并
入月產圖體玄子借地法安產藏衣方位附之合爲

一集可爲完書矣余喜從之猶恐有錯謬未書者更命諸名醫復加校正余謂公曰書則完矣當如之何參謀周德甫聞之毅然贊成遂命工刊行自今以始庶令妊婦得安產媼無失家自可以修藥人自可以爲醫來者可知而傳之愈廣矣冀致君序

余收產論二十一篇議論精確無所不究蓋國醫博士極方書所得之妙惜乎有其說而無其方郭君稽中爲時良醫尤長于治產故其切脈用藥屢獲奇效一日願以所收家方附于諸論之末遂爲完璧真集衆益之異書也古人謂人子而不學醫者爲不孝則



有方論而不傳于世者其可謂之仁哉李師聖序



欽定四庫全書

產育寶慶集方

提要

臣

等謹按產育寶慶集方二卷不著撰人

名氏宋史藝文志以爲郭稽中撰考陳振

孫書錄解題稱濮陽李師聖得產論二十

一篇有說無方醫學教授郭稽中爲時良

醫以方附諸論末遂爲完書則稽中特因

師聖所得舊本增以新方非所自撰宋史

所載似未見陳氏說也然稽中所增合產

論其爲一卷於此本不合以卷首諸序考
之蓋括蒼陳言撰三因方常取其方論各
評得失婺醫杜蒨因採其所評附入各條
之下後趙瑩得產乳備要增以楊子建七
說合於產論爲一集有冀致君者又掇御
藥院雜病方論及八月產圖體立子借地
法安產藏衣方位綴于其末是輾轉增益
已非郭氏之舊特沿其舊名耳其書世罕
傳本今載於永樂大典者得論二十一陳
言評十六方三十四爲一卷產乳備要暨



經氣妊娠等證方六十二爲二卷其體
子借地法永樂大典佚不載今亦闕焉按
胎教之法古人所重賈誼新書所引青史
氏之記劉向列女傳所記太任育文王之
事尙可見崖略惟產育方藥則罕專書唐
書藝文志有咎殷產寶一卷始別立一門
今其書不傳則講妊育者當以是書爲最
古矣卷中惟陳言之論標識姓名餘皆不
標爲誰說今以原本體例推之上卷之方
皆出郭氏下卷婉乳安產經氣三條外殆

卽楊氏之說所附方藥殆卽冀致君所採
御藥院方也陳言有三因方已著錄楊子
建名倓有楊氏家藏方今未見李師聖等
皆南宋人冀致君序稱諸人爲宋儒又稱
近在燕趙間蓋元人云乾隆五十年二月
恭校上

熱疾胎死腹中

產育寶慶集方卷上

宋李師聖等編

第一論曰。熱疾胎死腹中者何。答曰。因母患熱疾。至六七日以後。藏府極熱。薰灼其胎。是以致死。緣兒身死冷。不能自出。但服黑神散。煖其胎。須臾胎氣溫煖。即自出。何以知其胎之已死。但看產舌色青者。是其驗。

黑神散

桂心

當歸

芍藥

甘草 炙

